

Premio Promocional Santa Anna 2006 a honra Franklin Anthony Gregory Ridderstaat

ORANJESTAD- Diasabra ultimo, riba nos dia nacional, a entrega e prestigioso Premio Promocional Santa Anna na sr. Franklin Anthony Gregory Ridderstaat, miho conoci como Rene. Rene ta biba na Seroe Janchi 8, y ta traha actualmente na Departamento di Asunto Social, seccion team Noord situa na Noord 68. Rene a nace dia 21 di Mei 1970 coma yiu di e conocido Joseph "Cheppi Posterij" Ridderstaat y sra. Dorothea "Do" Ridderstaat, di felis memoria. Di e matrimonio aki a nace 12 yiu di cual Rene ta e "Benjamin" di e famia. Despues di a cursa enseñansa basico na Noord, Rene a sigui su estudio na Mavo y EPI sector social medewerker cual el a termina

exitosamente na 2002. Locual ta resalta durante e añanan di estudio ta cu e tabata bai scol parti mainta, traha na Sociale Zaken parti merdia y ainda resta tempo pa trabounan boluntario.

Rene tabata miembro di Coro Sta. Anna y tambe e tabata percura pa trahamento di pesebre anualmente den misa. Pero Rene su amor grandi ta Verkennerij. Di chikito el a incorpora den e organisacion di Scout y e tabata e prome lider cu a wordo instala como Lider di Bevers na Aruba, V.A.P., Noord, Grupo San Dominico cual ta alga unico. Rene ta un di fundadornan y lider di Noord Youth Club, cual organisacion ta organisa actividadnan social y educativo pa hobennan.

Mester menciona aki cu di tur e clubnan cu a wordo funda rond di Aruba, Noord Youth Club ta e unico cu ainda ta funciona.

Rene ta activo riba un scala di tereno social. E ta miembro di Plataforma Social Noord, Famia Planea y ATHA/Cede Aruba, cual ta un organisacion cu ta traha pa hubentud. Fuera di esenan e a forma parti di e Comision forma dor di Gobierno di Aruba pa yega na establece un Parlamento Hubenil. El a cumpli cabalmente cu e tarea aki. Rene tabatin tin e honor tambe di guia Prins Willem Alexander y Princesa Maxima durante nan bishita na e Bazaar Hubenil cu a wordo teni na EPB-Hato. Durante temporada di

Camaval por mira Rene tur caminda como miembro di SAC, den cual e tin e funcion clave di Secretario General di Directiva diario y e ta e coordinador di e Camaval completo pa SAC.

Algo hopi remarcabel ta cu mayoria di loke e ta haci, e ta haci'e a base boluntario. Rene ta un hoben cu ta un ehempel pa

nos comunidad. E ta un hoben cu bon manera, hopi cariñoso, cu respet pa su grandinan, cla pa yuda y semper bai cu un joke pa conta. Sigur un ehempel pa sigui. Durante un ceremonia emocionante dia 18 di Maart, Rene a ricibi su plakkaat, y cu hopi emocion, el a gradici esnan cu a dune e honor special aki.

